



*Iesus est mené de nuict chez Anne beau-pere de Caiphe grand Prestre ,
où il est renié par Pierre.*

NTRE les gens-d'armes & satelites qui auoient pris Iesus-Christ , y estoient aussi quelques Scribes & Prestres pour leur donner plus d'audace & autorité de mal faire, ausquels Iesus adressant sa parole, dist; Vous estes venus comme à vn brigand , pour me prendre avec glaiues & bastons , & si i'estois tous les iours avec vous assis , & enseignant au Temple ; toutesfois vous n'avez point mis la main sur moy ; mais c'est icy vostre heure & la puissance des tenebres. Or tout cecy a esté fait afin que les Escritures & les Propheties fussent accomplies: Et lors les Disciples le laisserent, & s'enfuirent; & vn ieune homme couuert d'un linceul s'échappant de leurs mains, leur laissa le linceul dont il estoit enuelpé. Adonc les Capitaines & les Iuifs prirent Iesus, le lierent & garotterent estroitement & l'emmenèrent premierement à Anne: car il estoit beau-pere de Caiphe, qui estoit grand Sacrificateur cette année-là , & estoient chez luy assemblez les Sacrificateurs, les Scribes & Prestres. Or Simon Pierre suiuoit de loin Iesus, & vn autre Disciple qui estant entré iusques à la salle , à cause de sa connoissance , y fit entrer aussi Pierre qui peu apres renia son Maistre Iesus, disant par trois fois, Je ne le connois point.

S. Matthieu Chap. 26. S. Marc Chap. 14. S. Luc Chap. 22. S. Iean Chap. 18.